



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

**Sumáriu prosesu julgamentu kazu iha Tribunál Distritál Baucau**  
**Períodu Abril 2012**

***Sumáriu Kazu***

Periodu : Abril 2012

Edisaun : 10 Maiu 2012

**Introdusaun**

Durante fulan Abril 2012 nia laran, hahú husi dia 10 to' o dia 24 Abril 2012, JSMP kontinua hala'ó atividade monitorizasaun iha Tribunál Distritál Baucau.

Iha períodu semana tolu ne'e, JSMP konsege rejista kazu ne'ebé JSMP monitoriza hamutuk 17. Kazu hirak ne'e kompostu husi kazu krime violénsia doméstika 6, kazu krime ofensa ba integridade fízika simples 4, kazu krime danu agravadu 1 no kazu krime danu simples 1, omisídiu agravadu 1 no krime tentativa violasaun seksuál 1, krime abuzu seksuál ba menor 2 no krime maus tratus 1.

Entre totál kazu sira iha leten, balun sei kontinua halo julgamentu, balun hetan ona desizaun liu husi fiksa pena konkreta maibé balun konklui liu husi prosesu konsiliaasaun ba krime menor sira. Aleinde ne'e, kazu balun la konsege hala'ó julgamentu tanbá parte interesante sira la kumpri notifikasaun no ida tanbá impedimentu husi tribunál ne'ebé sei deskreve iha sesaun tuir mai.

Hanesan haktuir iha leten, JSMP rejista katak kazu violénsia doméstika mak hetan fatin a'as liu iha Tribunál Distritál Baucau ba fulan ida ne'e.

Similar mós ho edisaun sira seluk, sumáriu ida ne'e ho objetivu atu habelar informasaun konabá lala'ók prosesu julgamentu iha tribunál Distritál Baucau.

Tuir mai deskripsaun sumáriu julgamentu kompletu:

## **1. Kazu krime ofensa ba integridade fízika simples; Nú. 41/Crm.S/2011/TDB**

Iha lora 10 Abril 2012, Tribunál Distritál Baucau hala'ó julgamentu tentativa konsiliaun ba kazu krime ofensa ba integridade fízika simples ne'ebé rejista ho Númeru Prosesu: 41/Crm.S/2011/TDB. Kazu ne'e involbe husi arguida no naran Petrolina Hornay hasoru vítima ho naran Ana Teresa da Rosa. Kazu ne'e akontese iha lora 19 Dezembru 2010, iha Aldeia Samagata, Suco Sagadate, Sub-distritu Laga, Distritu Baucau.

Julgamentu tentativa konsiliaun ne'e prejidi husi Juíz singular, Dr. José Gonçalves, husi Ministériu Públiku representa husi Dr. Aderito Tilman no arguida hetan defeza husi Dr. Gregório de Lima husi Defensória Públiku.

Prosesu tentativa konsiliaun ne'e vítima no arguida dame malu no prontu simu malu tanbá antes ne'e sira rejolve ona liu husi dalan família.

## **2. Prosesu ne'e konklui ho akta eskrita husi tribunál hodi omologo kazu ida ne'e. Kazu krime violénsia doméstika, Nú. 155/Crm.S/2011/TDB**

Iha lora hanesan (10 Abril 2012), Tribunál Distritál Baucau kontinua hala'ó julgamentu ba kazu krime ofensa ba integridade fízika simples ho natureza violénsia doméstika. Kazu ne'e rejista ho Númeru Prosesu 155/Crm.S/2011/TDB. Arguidu ba kazu ne'e ho inisiál RF hasoru nia kónjuje ho inisiál AF, ne'ebé akontese iha lora 21 Outobru 2010 iha Aldeia Osogigi, Suco Uma Analu, Sub-distritu Venilale, Distritu Baucau.

Prosesu julgamentu prejide husi juíz singular, Dr. Afonso Carmona, Ministériu Públiku representa husi Dra. Benvinda da Costa do Rosário no arguidu hetan defeza husi Dr. Gregório de Lima husi Defensória Públiku.

Julgamentu hahú ho lee akuzasaun Ministériu Públiku. Iha akuzasaun ne'e haktuir katak iha lora 21 Outobru 2010, maiz ou menus iha tuku 06:00 dadersan arguidu trata vítima, no hodi ai dona ida baku dala tolu iha vítima nia ulun no dala rua iha liman karuk. Hahalok refere kauza vítima sofre kanek iha ulun no lina kabun parte karuk nakfera.

Iha akuzasaun ne'e mós haktuir katak kazu ne'e akontese tanbá vítima haruka arguidu ba tau naran iha aldeia hodi tuir eskola alfabetismu.

Relasiona ho aktu ne'e, Ministériu Públiku akuza arguidu ho artigu: 145 Kódigu Penal konjugadu ho artigu, 2.2 Lei Kontra Violénsia Doméstika.

Iha deklarasaun arguidu ba tribunál katak faktus ne'ebé akuza ba nia ne'e loos hotu no nia deklarasaun nia arepende ba nia hahalok no lora seluk sei la repete hahalok hanesan.

Aleinde ne'e, iha deklarasaun vítima nian ba tribunál mós haktuir katak arguidu halo duni hahalok ne'ebé hakerek iha akuzasaun.

Rona tiha deklarasaun husi parte sira, tribunál kontinua ba alegasaun final. Iha alegasaun ne'e, Ministériu Públiku husu ba tribunál atu aplika pena suspensaun ba arguidu tanbá ho razaun arguidu konfesa faktus, sira diak malu ona, kondisaun arguidu ne'ebé idade katuas ona no matan mós aat.

Iha parte seluk defeza mós husu ba tribunál atu aplika pena ne'ebé adekuaudu tanbá nia kliente konfesa, arepende, no tanbá arguidu ho kondisaun matan aat no idade avansadu ona.

Tribunál marka fali agenda lee leitura sentensa iha loron 25 Abril 2012.

### **3. Kazu krime violénsia doméstika, Nú. 147/Crm.S/2011/TDB**

Tuir mai, se iha loron hanesan (10 Abril 2012), Tribunál Distritál Baucau kontinua hala'ó julgamentu ba kazu krime ofensa ba integridade fízika simples ho natureza violénsia doméstika. Kazu ne'e rejista ho número prosesu 147/Crm.S/2011/TDB. Arguidu ba kazu ne'e ho inisiál IA hasoru nia kónjuje ho inisiál AR. Kazu refere akontese iha loron 01 Setembru 2010, iha Aldeia Dasiwati, Suco Afaloicai, Sub-Distritu Uato-Lari, Distritu Viqueque.

Prosesu julgamentu prejide husi juíz singular, Dr. Afonso Carmona, Ministériu Públiku representa husi Dr. Pascasio de Rosa Alves no arguidu hetan defeza husi Dr. Gregório de Lima husi eskritóriu Defensória Públiku.

Prosesu julgamentu hahú ho lee akuzasaun Ministériu Públiku. Iha akuzasaun haktuir katak iha loron 01 Setembru 2010, arguidu tolok vítima, no hamrik tuku dala ida iha vítima nia matan fukun parte loos, tuku iha kotuk laran, tebe dala ida iha kanotak no dada vítima ba iha Estrada klaran.

Motivu akontesimentu tanbá arguidu husu hahan ba vítima wainhira arguidu fila husi Dili, maibé tanbá vítima haruka fali arguidu ba foti rasik modo, nune'é arguidu halo aktus refere hasoru vítima.

Iha audiénsia julgamentu parte sira (arguidu no vítima) uza sira nia direítu nonook. Tanba ne'é tribunál deside kontinua julgamentu ba iha loron 07 Agostu 2012 hodi rona testamuña sira.

### **4. Kazu krime ofensa ba integridade fízika simples, Nú. 123/Crm.S/2010/TDB**

Iha loron 11 Abril 2012, Tribunál Distritál Baucau hala'ó julgamentu tentativa konsiliaun ba kazu krime ofensa ba integridade fízika simples ne'ebé rejista ho Número Prosesu 123/Crm.S/2010/TDB. Kazu ne'e involve arguidu Francisco Filipe Barbosa hasoru vítima, Jacinto Ximenes da Silva. Kazu ne'e akontese iha loron 06 Feveiru 2008, iha bairo antigo Vila Baucau.

Iha julgamentu tentativa konsiliaun ne'e prejide husi juiz singular, Dr. José Gonçalves, husi Ministériu Públiku representa husi Dr. Aderito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Antes hahú produz ho prosesu produsaun provas ba kazu ne'e, tribunál bazeia ba artigu: 262 Kódigu Prosesu Penál halo konsiliaun ba arguidu no vítima. Iha prosesu konsiliaun ne'e vítima no arguidu simu malu atu rezolve sira nia problema liu husi rezolusaun família.

Bazeia ba pedidu parte rua tribunál absolve arguidu husi krime ne'ebé nia komete.

#### **5. Kazu krime danu simples, Nú. 99/Crm.S/2010/TDB**

Iha loron hanesan (11 Abril 2012), Tribunál Distritál Baucau hala'ó julgamentu lee leitura sentensa ba kazu krime danu simples ne'ebé rejista ho Número Prosesu 99/Crm.S/2010/TDB. Arguidu ba kazu ne'e involve ema nain tolu (3) mak hanesan: Januari da Costa alias Melok, Januari da Costa no Domingos da Costa hasoru vítima Norberta da Costa. Kazu ne'e akontese iha loron 24 Abril 2008, iha Aldeia Haurobu, Suco Caibada Uaimua, Sub-Distritu Baucau, Distritu Baucau.

Bazeia ba faktus sira ne'ebé produz durante julgamentu, tribunál konvensidu katak arguidu sira provadu komete krime danu simples ne'ebé prevista iha artigu: 258 Kódigu Penál ho pena prizaun tinan 3 ka multa.

Mesmu nune'e depois avalia prosesu tomak, tribunál konsidera no hanoin katak pena multa mak adekuada liu ba arguidu sira. Ho nune'e tribunál konklui hodi hamonu pena multa ba kada arguidu sei selu multa ho osan valor US\$. 75.00, hamutuk US\$. 225.00. Pena multa ne'e sei selu durante loron 150 nia laran. Kada loron sei selu US\$. 0.50 Centavus no kondena arguidu sira selu taxa justisa US\$. 10.00.

Tribunál mós subliña katak sé arguidu sira la kumpri pena ne'e, arguidu sira sei hatan pena prizaun durante loron 100.

#### **6. Kazu krime violénsia doméstika, Nú. 28/Crm.S/2012/TDB**

Iha loron 12 Abril 2012, Tribunál Distritál Baucau hala'ó julgamentu ba kazu krime ofensa ba integridade física simples ho natureza violénsia doméstika. Kazu ne'e rejista iha tribunál ho Número Prosesu 28/Crm.S/2012/TDB no involve arguidu ho naran Roberto Soares hasoru nia kónjuje Isabel da Costa. Kazu ne'e akontese iha loron 08 Setembru 2011 iha Aldeia Mamura, Suco Caraubalu, Sub-Distritu Viqueque, Distritu Viqueque.

Prosesu julgamentu prejide husi juiz singular, Dr. Antonio Fonseca Monteiro, Ministériu Públiku representa husi Dr. Pascasio de Rosa Alves no arguidu hetan defeza husi Dr. Gregório de Lima husi Eskritóriu Defensória Públiku.

Audiência julgamentu hahú ho lee akuzasaun Ministériu Públiku. Iha akuzasaun ne'e haktuir katak iha lora 08 Setembru 2011, arguidu tuku dala rua iha vítima nia ulun no buti vítima nia kakorok no riba ba rai. Aktu ne'e rezulta vítima sofre bubu iha kakorok, bubu iha ulun no moras iha isin loloon tomak.

Motivu akontesimentu kazu tanbá vítima husu osan US\$.1.00 ba arguidu atu ba dulas hare kulit maibé arguidu la fo nune'é vítima nervozu hodi soe hare kulit ba rai no hateten ba arguidu katak tinan barak ona sira moris hamutuk maibé husu osan sentavus ida mós arguidu la fo. Rona lia fuan hirak ne'e arguidu nervozu no halo aktus refere iha leten hasoru vítima.

Relasiona ho hahalok arguidu ida ne'e, Ministériu Públiku akuza ho artigu 145 Kódigu Penál konjugadu ho artigu 2. 2 Lei Kontra Violénsia Doméstika.

Iha audensia julgamentu ne'e arguidu uza nia direitu bazeia ba artigu 60.c Kódigu Prosesu Penál hodi la fo nia deklarasaun.

Tuir testamuña MdC ne'ebé tribunál notifika depoimenta katak antes akontese kazu ne'e entre arguidu ho vítima istoria malu, no arguidu buti iha vítima nia kakorok no tuku iha vítima nia ulun.

Iha parte seluk, iha vítima nia deklarasaun nia kontinua reforsa ho depoimentu husi testamuña, katak arguidu halo duni hahalok hanesan haktuir iha akuzasaun laran.

Rona tiha parte sira, tribunál kontinua ba alegasaun final. Iha alegasaun Ministériu Públiku husu ba tribunál atu aplika pena multa ba arguidu. Aleinde ne'e, iha parte seluk, iha defeza ninia alegasaun finál husu ba tribunál atu aplika pena ne'ebé adekuaudu tanbá nia kliente foin primeira-vez halo krime no akontesimentu ne'e mosu tanbá provokasaun husi vítima.

Depois-de alegasaun finál tribunál kontinua hala'ó leitura sentensa iha tuku rua (2) lorokraik. Bazeia ba faktus ne'ebé tribunál produz, tribunál konvensidu katak arguidu komete duni krime ofensa ba integridade física simples tuir artigu: 145 Kódigu Penál konjugadu ho artigu: 2.2 Lei Kontra Violénsia Doméstika.

Bazeia prosesu ne'e, tribunál konklui hodi hamonu pena prizaun fulan ne'en (6), maibé suspende ba tinan ida (1).

## **7. Kazu krime danu agravadu, Nú. 156/Crm.C/ 2011/TDB.**

Iha lora hanesan (12 Abril 2012), Tribunál Distritál Baucau hala'ó julgamentu lee leitura akordaun ba kazu krime danu agravadu ne'ebé rejista ho Número Prosesu 156/Crm.C/2011/TDB. Kazu ne'e involve arguidu Tomas da Costa hasoru vítima Justino Ximenes. Kazu ne'e akontese iha lora 31 Outobru 2010, iha Aldeia Kuluhun, Suco Fuiloro, Sub-Distritu Lospalos, Distritu Lautem.

Iha audiência julgamentu leitura akordaun ne'e prejide husi juizes koleтиву, Dr. José Gonçalves no adjuntu nain rua Dra. Ângela Faria Belo no Dra. Edite Palmira Dos Reis. Ministériu Públiku representa husi Dr. Aderito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Iha audiência julgamentu leitura akordaun ne'e, tribunál konvensidu katak iha loron 31 Outobru 2010, arguidu hodi katana ta'a kuak motor nia depozitu no sunu motor refere. Motor refere ho número matrikula B. 2639 (motor Xefe Suco Loré). Hahalok arguidu ne'e Ministériu Públiku akuza ho artigu: 259 Kódigu Penál. Motivu akontesimentu ba kazu ne'e tanbá motor refere konduz husi vítima nia alin Acaçio Oliveira xoke arguidu nia oan.

Bazeia ba faktus ne'ebé tribunál produz, ikus mai tribunál konklui hodi hamonu pena konkreta tinan 2 fulan 6 maibé substitui fali pena suspensaun tinan 2. Aleinde, Tribunál la fiksa pena indemnizasaun sivíl tanbá laiha dokumentu ruma ne'ebé hatudu katak vítima nain ba motor.

#### **8. Kazu krime omisidiu agravadu, Nú. 29/Crm.C/2012/TDB**

Iha loron 18 Abril 2012, Tribunál Distritál Baucau la konsege realiza prosesu julgamentu ba kazu krime omisidiu ne'ebé rejisat ho Número Prosesu 29/Crm.C/2012/TDB. Arguidu ba kazu ne'e involve ema nain 7 ho inisiál hanesan TL, OL, AL, AtL, OIL, FS no VS hasoru vítima matebian nain rua ho naran David Armando Ramosno Alarico Soares. Kazu ne'e akontese iha loron 20 Agustus 2011 Iha Aldeia Hailarino, Suco Luro Sub-Distritu Luro Distritu Lautem.

Audiência julgamentu prejide husi juizes koleтиву ne'ebé kompostu husi Dr. Antonio Fonseca Monteiro, Dr. José Gonçalves no Dra. Ângela Faria Belo, husi Ministériu Públiku representa husi Dr. Aderito Tilman no arguidu sira hetan defeza husi Dr. Gregório de Lima husi eskritóriu Defensória Públiku no Dr. Ângelo Neves husi advogadu privadu.

Mesmu nune'e, prosesu julgamentu ba kazu ne'e la konsege realiza tanbá tradutor husi tribunál ba lian *sae'ene* disponivel iha fatin. Bazeia ba razaun ida ne'e tribunál decide marka fali prosesu julgamentu ba loron 25 Abril 2012.

Tribunál decide sei halo karta ofisiál ida ba Administradór Distritu Lautem hodi indika/prepara ema ruma ne'ebé iha koñesementu diak iha lian *Sae'ene* no *Tetum* hodi halo tradusaun iha loron julgamentu iha loron 25 Abril 2012.

#### **9. Kazu krime violénsia doméstika, Nú. 132/Crm.S/2012/TDB**

Tuir agenda Tribunál Distritál Baucau mós iha loron no data hanesan (18 Abril 2012) la konsege hala'ó julgamentu ba kazu krime violénsia doméstika ne'ebé rejista ona ho Númeru Prosesu 132/Crm.S/2012/TDB. Kazu ne'e involve arguidu ho inisiál JX hasoru nia kónjuje ho inisial MS. ne'ebé akontese iha loron 20 Abril 2010, iha Aldeia Caiobilale Suco Caibada Sub-distritu Baucau, Distritu Baucau.

Audiénsia julgamentu ba kazu ne'e la konsege realiza tanbá arguidu la kompri notifikasaun. Tuir informasaun ne'ebé JSMP hetan husi ofisiál katak adiamentu kazu ne'e seidauk klaru tanbá prosesu seidauk entrega ba ofisiál (prosesu sei iha juíz nia liman).

#### **10. Kazu krime violénsia doméstika, Nú. 20/Crm.S/2012/TDB**

Iha loron 19 Abril 2012, Tribunál Distritál Baucau kontinua hala'ó prosesu julgamentu ba kazu krime violénsia doméstika seluk ne'ebé ho Númeru Prosesu: 20/2012/TDB. Kazu ne'e involve arguidu ho inisiál TFA hasoru nia kónjuje ho inisiál CMF, ne'ebé akontese iha loron 24 Agostu 2010, iha Aldeia Lutu-Mutu, Suco Trilolo Sub-distritu Baucau, Distritu Baucau.

Julgamentu kontinuasaun ne'e prezide husi juíz singulár Dr. Antonio Fonseca Monteiro, Ministériu Públiku representa husi Dra. Benvinda da Costa do Rosário no arguidu hetan defeza husi Dr. Gregório de Lima husi Eskritóriu Defensória Públiku.

Audiénsia julgamentu kontinua rona depoimentu husi testamuña. Iha testamuña DF nia depoimentu hateten katak nia la hare ho matan rasik relasiona akontesimentu, maibé nia hatene deit katak kazu ne'e rezolve ona iha nível suco. Rona tiha testamuña tribunál kontinua ba alegasaun finál.

Iha alegasaun finál, Ministériu Públiku husu ba tribunál atu aplika pena multa ba arguidu. Iha parte seluk defeza husu ba tribunál atu absolve nia kliente husi kazu ne'e tanbá nia kliente rezolve ona kazu ne'e iha nível suco.

Ikus mai tribunál decide marka loron 19 Abril 2012 oras tuku 10:00 ba leitura sentensa.

#### **11. Kazu krime tentativa violasaun seksual, Nú. 04/Crm.C/2012/TDB.**

Iha loron hanesan (19 Abril 2012), Tribunál Distritál Baucau kontinua hala'ó julgamentu ba kazu krime tentativa violasaun seksuál ne'ebé rejista iha tribunál ho Númeru Prosesu 04/Crm.C/2012/TDB. Kazu ne'e involve arguidu ho inisiál HF hasoru vítima ho inisiál ARM ne'ebé akontese iha loron 17 Juñu 2011, iha Aldeia Bugate, Suco Trilolo, Sub-Distritu Baucau, Distritu Baucau.

Audiénsia julgamentu prezide husi kompozisaun juízes kolektivu, Dr. José Gonçalves , Dr. Afonso Carmona no Dr. Antonio Fonseca Monteiro. Ministériu Públiku representa husi Dr.

Aderito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Prosesu julgamentu ba kazu ne'e taka ba públiku, maibé tuir informasaun ne'ebé JSMP hetan husi fontes konfirmadu husi tribunál refere katak, Ministériu Públiku akuza arguidu tuir artigu: 23,172 no 173 (d).

Leitura akordaun ba kazu ne'e sei halo iha loron 03 Maiu 2012.

## **12. Kazu krime violénsia doméstika, Nú. 20/Crm.S/2011/TDB**

Iha loron 20 Abril 2012, Tribunál Distritál Baucau kontinua hala'ó julgamentu leitura sentensa ba kazu krime violénsia doméstika ne'ebé rejista ho Númeru Prosesu 20/Crm.S/2011/TDB. Kazu ne'e involve arguidu Teofilo Freitas Amaral hasoru nia kónjuje Celestina Martins Freitas. Kazu ne'e akontese iha loron 24 Agustus 2010, iha Aldeia Lutu-Mutu, Suco Trilolo Sub-distritu Baucau, Distritu Baucau.

Audiénsia julgamentu prezide husi juíz singulár Dr. Antonio Fonseca Monteiro, Ministériu Públiku representa husi Dr. Aderito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Iha prosesu julgamentu ne'e tribunál konvensidu katak arguidu provadu komete krime ofensa ba integridade física simples iha artigu 145 Kódigu Penál konjugadu ho artigu 2.2 Lei Kontra Violénsia Doméstika ne'ebé ho pena prizaun fulan 3 to'o tinan 3.

Bazeia ba faktus sira ne'ebé tribunál produz,tribunál konklui hodi hamonu pena prizaun fulan 7 suspende ba tinan 1.

## **13. Kazu krime abuzu seksuál ba menor, 96/Crm.C/2011/TDB**

Iha loron 20 Abril 2012 Tribunál Distritál Baucau hala'ó julgamentu ba kazu krime abuzu seksuál ba menor ne'ebé rejista ho Númeru Prosesu 96/Crm.C.2011/TDB. Kazu ne'e involve arguidu ho inisiál CCB hasoru vítima ho inisiál ASCF ne'ebé akontese iha loron 05 Abril 2011 iha Aldeia Anavaru, Suco Caibada/Uaimua, Sub Distritu Baucau, Distritu Baucau.

Audiénsia julgamentu prezide ho kompozisaun juízes kolektivu; Dra. Ângela Fária Belo, Dr. Afonso Carmona no Dr. José Gonçalves, Ministériu Públiku representa husi Dr. Aderito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Audensia julgamentu taka ba Públiku, maibé informasaun ne'ebé JSMP konsege hetan katak depois-de rona parte interesadu sira tribunál marka fila fali julgamentu ba leitura sentensa iha loron 04 Maiu 2012.



#### **14. Kazu krime maus-tratus ba kónjuje, Nú. 26/Crm.C/2012/TDB**

Iha lora hanesan (20 Abril 2012), Tribunál Distritál Baucau kontinua hala'ó julgamentu ba kazu krime maus-tratus ba kónjuje ne'ebé rejista ho Númeru Prosesu 26/Crm.C/2012/TDB. Kazu ne'e involve arguidu ho inisiál AC hasoru nia kónjuje ho inisiál MX, ne'ebé akontese iha lora 03 Agustus 2011, iha Aldeia Cauto, Suco Fuiluru, Sub-distritu Lospalos, Distritu Lautem.

Audiénsia julgamentu prezide husi kompozisaun juízes kolektivu, Dra. Ângela Fária Belo, Dr. Afonso Carmona no Dr. José Gonçalves. Entretantu, Ministériu Públiku representa husi Dr. Aderito Tilman no arguidu hetan defeza husi Dr. Gregório de Lima husi Eskritóriu Defensória Públiku.

Prosesu julgamentu hahú ho lee akuzasaun husi Mínistériu Públiku. Iha akuzasaun ne'e haktuir katak iha lora 03 Agustus 2011, arguidu diskute malu ho vítima, iha ikus arguidu foti nú sanak ida baku iha vítima nia ulun, iha matan fukun, no liman.

Konsekuénsia husi hahalok arguidu ne'e kauza vítima sofre kanek iha ulun, bubu iha liman, matan fukun no halo vítima oin halai.

Aleinde ne'e, iha akuzasaun ne'e mós haktuir katak arguidu baku vítima hamutuk ho kazu aktual hamutuk dala 20 ona.

Motivu akontesementu ba kazu ne'e tanbá vítima deve ema nia osan US\$. 60.00 no laiha koñesementu husi arguidu.

Iha arguidu nia deklarasaun katak akuzasaun ne'e loos hotu. Arguidu mós deklarasaun katak nia baku bebeik vítima tanbá vítima halo nia oan abortu. Iha julgamentu ne'e arguidu arepende ba nia hahalok no deklarasaun katak sei la repete tan iha futuru.

Iha deklarasaun vítima, nia ható katak arguidu halo bebeik aktus refere hasoru nia maibé vítima la ba halo denunsia iha polísia tanbá vítima lakohi arguidu hanesan nia laen tama kadeia.

Rona tiha parte sira, tribunál kontinua ba faze alegasaun finál. Iha Ministériu Públiku nia alegasaun finál, husu ba tribunál atu aplika pena ne'ebé adekua ba arguidu. Iha parte seluk defeza husu ba tribunál atu konsidera nia kliente tanbá, nia kliente konfesa, arepende no resposabiliza ba oan nain 7.

Tribunál marka leitura sentensa ba iha lora 04 Maiu 2012.

#### **15. Kazu krime abuzu seksuál ba menor, Nú. 117/Crm.C/2011/TDB**

Tuir agenda Tribunál Distritál Baucau iha lora 23 Abril 2012 hala'ó julgamentu ba kazu krime abuzu seksuál ba menor ne'ebé rejista ho númeru prosesu 117/Crm.C./2011/TDB.

Kazu ne'e involve husi arguidu ho inisiál JM. Maibé julgamentu ba kazu ne'e la bele realiza tanbá juiz sira iha impedimentu atu marka prezensa iha tribunál.

Tuir informasaun ne'ebé JSMP hetan husi tribunál katak, audénsia julgamentu la konsege realize tanbá, juíz sira tuir enkontru Konsellu Magistradu iha Dili.

Tuir mai, kazu ne'e adia ba loraon 18 Juñu 2012.

#### **16. Kazu krime violénsia doméstika, Nú. 02/Crm.S/2012/TDB**

Iha loraon 24 Abril 2012, Tribunál Distritál Baucau hala'ó julgamentu ba kazu krime violénsia doméstika ne'ebé resjita ho Númeru Prosesu 02/Crm.S/2012/TDB. Kazu ne'e involve husi arguidu ho inisiál JdS hasoru nia kónjuje ho inisiál NAS. Kazu refere, akontese iha loraon 28 Juñu 2011, iha RSS Vila Nova Baucau.

Prosesu julgamentu prezide husi juíz singulár, Dr. Afonso Carmona, husi Ministériu Públiku reprezenta husi Dra. Benvinda da Costa do Rosário no arguidu hetan defeza husi Dr. Gregório de Lima husi Eskritóriu Defensória Públiku.

Audiénsia julgamentu hahú ho lee akuzasaun husi Ministériu Públiku. Iha akuzasaun ne'e haktuir katak iha loraon 28 Juñu 2011 arguidu buti vítima nia kakorok, tuku dala ida iha vítima nia ren toos, tebe dala ida iha vítima nia kelen no buti dala ida tan vítima nia kakorok hodi riba ba rai no kontinua hanehan ho arguidu nia ain tuur to'ó vítima labele book-aan. Kansekuensia husi hahalok arguidu ne'e halo vítima sofre moras iha nia isin loloon tomak no konsege ba halo tratamentu iha Ospitál.

Iha akuzasaun ne'e mós haktuir katak motivu akontesimentu ba kazu ne'e tanbá arguidu nia alin fetu telefone vítima, maibé vítima hatan ho siak.

Iha audiénsia julgamentu ne'e parte interesadu sira hotu-hotu uza sira nia direitu nonook. Arguidu uza nia direitu bazeia ba artigu: 60 letra C Kódigu Prosesu Penál (KPP) no vítima uza nia direitu bazeia ba artigu 125.1 letra b. Kódigu Prosesu Penál (KPP).

Relasiona ho kestaun ba aplikasaun artigu 125 KPP husi tribunál, Ministériu Públiku sei rekorre ba Tribunál Rekursu, mesmu antes ne'e Tribunál Rekursu hasai ona akordaun ida relasiona ho konflitu interpretasaun ba provizaun refere. Depoisde rona tiha parte sira tribunál kontinua ba alegasaun finál. Iha Ministériu Públiku nia alegasaun finál, husu ba tribunál atu aplika pena suspensaun ba arguidu. Aleinde ne'e, iha defeza nia alegasaun finál, husu ba tribunál atu aplika pena ne'ebé adekuadu ba nia kliente.

Tribunál marka loraon 09 Maiu 2012 ho agenda leitura sentensa.

#### **17. Kazu krime ofensa ba integridade fízika simples ,Nú. 123/Crm.S/2011/TDB**

Iha loron hanesan (24 Abril 2012) Tribunál Distritál Baucau kontinua hala'ó julgamentu tentativa konsiliaisaun ba kazu krime ofensa ba integridade fízika simples. Arguidu ba kazu ne'e involve ema nain 3 ho ida-idak nia naran hanesan Ilidio Araújo da Cruz, Felismino Rosario, Eugebio Agosto Belo hasoru vítima nain rua ho naran Francisco da Silva no Pascoela Pinto. Kazu ne'e akontese iha loron 13 Agostu 2011, iha Aldeia Lutu-mutu, Suco Trilolo, Sub-Distritu Baucau, Distritu Baucau.

Audiénsia ne'e prezide husi juíz singulár Dr. José Gonçalves , Ministériu Públiku reprezenta husi Dra Benvida da Costa do Rosário no arguidu sira hetan defeza husi Dr. Gregório de Lima husi Eskritóriu Defensória Públiku.

Iha julgamentu hodi halo tentativa konsiliaisaun ne'e vítima nain rua prontu atu dada fali sira nia kazu hasoru arguidu nain tolu.

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883